

# ДАСТЛАБКИ ТЕРГОВДА ЖИНОЯТ ИШИНИ ТУГАТИШНИНГ МОҲИЯТИ ВА АСОСЛАРИ

Муҳаммадулло Рахматуллаевич ЧУТБАЕВ

Тошкент давлат юридик университети Ихтисослаштирилган филиали Жиноят-хукуқий фанлар кафедраси доценти

## **АННОТАЦИЯ**

Мақолада дастлабки терговда жиноят ишини тугатиш институнинг моҳияти ва асослари таҳлил қилинган. Шунингдек жиноят ишини тугатишнинг босқичлари ҳамда мазкур институтнинг ижтимоий-сиёсий, процессуал-хукуқий, жиноят-хукуқий ва тарбиявий жиҳатлари ўрганилиб, жиноят ишини тугатишнинг шартлари таърифи ишлаб чиқилган.

**Калит сўзлар:** дастлабки тергов, жиноят ишини тугатиш, жиноят ишини тугатиш асослари ва шартлари, жиноят ишини тугатиш босқичлари.

## **АННОТАЦИЯ**

В статье анализируются сущность и основы института прекращения уголовного дела на предварительном следствии. Также были изучены этапы прекращения уголовного дела и социально-политические, процессуально-правовые, уголовно-правовые и воспитательные аспекты данного института, а также разработано определение условий прекращения уголовного дела.

**Ключевые слова:** предварительное следствие, прекращение уголовного дела, основания и условия прекращения уголовного дела, стадии прекращения уголовного дела.

## **ANNOTATION**

The article analyzes the essence and foundations of the institution of termination of the criminal case in the preliminary investigation. Also, the stages of termination of the criminal case and the social-political, procedural-legal, criminal-legal and educational aspects of this institute were studied, and the definition of the conditions for closing the criminal case was developed.

**Keywords:** preliminary investigation, termination of criminal case, grounds and conditions of termination of criminal case, stages of termination of criminal case.

Жиноят-процессуал қонун хужжатларининг вазифалари жиноятларни тез ва тӯла очиш, жиноят содир этган хар бир шахсга адолатли жазо берилиши ҳамда айби бўлмаган ҳеч

бир шахс жиной жавобгарликка тортилмаслиги ва ҳукм қилинмаслиги учун айборни фош этиш, шунингдек қонуннинг тўғри тадбиқ этилишини таъминлашдан иборат. Жиноят ишини юритишнинг жиноят-процессуал қонун хужжатларида белгиланган тартиби қонунийликни мустаҳкамлаш, жиноятларнинг олдини олиш, шахс, давлат ва жамият манфаатларини ҳимоя қилишга қаратилиши лозим.

Дастлабки терговни тамомлаш масаласи тергов органлари томонидан ишни якунига етказиш билан боғлиқ барча ҳолатлар аниқлангандан кейингина ҳал этиладиган масалалар сирасига киради. ЖПКнинг [1]

372-моддасига мувофиқ, дастлабки тергов жиноят ишини тугатиш тўғрисида қарор чиқариш, айблов хulosаси тузиш, ишни тиббий йўсиндаги мажбурлов чораларини кўллаш ёки тарафларнинг ярашуви учун судга юбориш тўғрисида қарор чиқариш ёхуд амнистия актига асосан жиноят ишини тугатиш ҳақида судга илтимоснома киритиш тўғрисида тақдимнома тайёрлаш билан тамомланади.

**Жиноят ишини тугатиш институти** ишни якунловчи жараён хисобланади. Ушбу жараёнда иш юзасидан йиғилган далилларни ҳар томонлама таҳлил қилишга, баҳолашга, шунингдек жиноят ишини юритиш ваколатига эга бўлган мансабдор шахснинг ишни тугатиш асослари бор ёки йўқлиги тўғрисида асосланган хulosага келишига имконият яратади.

«**Жиноят ишини тугатиш**» тушунчаси қонун ва қонуности норматив-ҳуқукий хужжатларда ўз аксини топмаганлиги боис, юридик адабиётда бу борада турли хил фикрлар мавжуд. Жумладан, Д.Камалходжаевнинг таъкидлашича, жиноят ишини тугатиш дастлабки терговни тамомлашнинг бошқа турларидан жиноят иши моҳиятининг тўлиқ ҳал этилиши ва якуний аҳамият касб этиши билан фарқ қиласди [2]. А.Б.Кулаҳметов жиноят ишини тугатиш деганда, тегишли ваколатларга эга органларнинг иш юзасидан далилларни тўплаш, тадқиқ этиш, баҳолаш ва у билан боғлиқ бошқа барча ваколатларининг тугатилишига олиб келишини тушуниш лозимлигини қайд этади [3].

Билдирилган мазкур фикрларда жиноят ишини тугатишнинг умумий мазмуни акс эттирилган бўлса-да, унинг кўллаш асослари ва шартларини ўз ичига қамраб олмаган. Яъни, мазкур институт ким томонидан ва қандай ҳолатларда қўлланилиши мумкинлиги ёритилмаган.

У.А.Тухташеванинг назарида қилмишда жиноят-процессуал муносабатлар мавжуд бўлишини инкор қиласиган юридик фактларнинг мавжудлиги жиноят ишини тугатишни тақозо этади [4]. В.И.Радченко бошчилигидаги бир гуруҳ олимларнинг фикрича эса, жиноят ишини тугатиш деганда мазкур иш бўйича келгусида жиноят-процессуал харакатлар олиб борилишини истисно этадиган ҳолатлар аниқланганлиги сабабли, терговни ишни тугатиш йўли билан тамомланиши тушунилади [5]. Билдирилган фикрларга қисман қўшилиш мумкин. Чунки, айrim ҳолатларда

ҳақиқатдан ҳам жиноят-процессуал муносабатлар мавжуд бўлишини инкор қиласиган юридик фактларнинг мавжудлиги жиноят ишини тугатилишига олиб келади. Лекин амалдаги ЖПҚда қайд этилган айрим асослар, жумладан ярашув, хусусий айблов, шунингдек шахснинг розилиги билан тугатиладиган ишни тугатиш асосларини қўллашда учун жиноят-процессуал муносабатлар мавжуд бўлишини инкор қиласиган юридик фактлар мавжуд, дея олмаймиз. Сабаби, мазкур ҳолатда жиноят иши тугатилиши ҳам, умумий тартибда давом эттирилиши ҳам мумкин.

Жиноят ишини тугатиш масалси терговчи томонидан ишга тааллуқли бўлган барча ҳолатлар тўғрисида ишонарли маълумотлар тўпланиб, аниқланган фактлар ўз исботини топганидан сўнг ҳал этиладиган масалалар сирасига киради. Масалан жиноят ишини қўзғатиш жиноят ишини тугатишдан тубдан фарқ қиласи. Уларнинг фарқи шундаки, ишни қўзғатиш масаласини ҳал қилишда тергов органдарида ишнинг ҳолатига ойдинлик киритиладиган тўлиқ маълумотлар ҳар доим ҳам бўлавермайди, тугатишда эса аксинча, терговчида мавжуд ҳолатни ёритадиган етарли ва ишончли далиллар бўлиши шарт.

Юқорида келтирилганларга хulosaga қиласиган бўлсак, жиноят ишини тугатиш дастлабки терговни якунловчи босқич бўлиб, тегишли ваколатга эга бўлган мансабдор шахснинг иш бўйича тўпланган далилларни таҳлил қилиш орқали ушбу асосни қўллаш барча ҳолатлар ўз исботини топганлигига ишонч ҳосил қилиб жиноят ишни тугатиш тўғрисида хulosaga келишидир.

### **Жиноят ишини тугатиш жиноят ишини тамомлашнинг турларидан бири сифатида қуйидаги босқичларни ўз ичига олади:**

- иш бўйича тўпланган далилларни таҳлил қилиш ва баҳолаш орқали қонунда ишни тугатиш билан боғлиқ бўлган тегишли асосни аниқлаб, келгусида терговни давом эттириш мумкин эмаслиги тўғрисида асосланган ва ишончли хulosaga чиқариш;
- жиноят иши материалларини талаб даражасида ҳужжатлаштириш ва тизимлаштириш (бу одатда далилларни баҳолаш ва қайд этиш билан боғлиқ, чунки бу ҳаракатлар далиллар манбаларини тадқиқ этишда ёрдам беради);
- жиноят ишини тугатиш тўғрисида қарор тайёрлаш;
- жиноят ишини тугатиш қарори билан боғлиқ барча масалаларни ҳал этиш, жумладан гумон қилинувчи (айбланувчи)га нисбатан қўлланилган эҳтиёт чорасини бекор қилиш, гумон қилинувчи (айбланувчи)дан олинган мулк ҳамда бошқа буюмларни қайтариб бериш ва бошқалар;
- гумон қилинувчи, айбланувчи ва ишнинг тугатилишидан манфаатдор бўлган барча шахсларга жиноят иши тугатилгани тўғрисидаги хабарни етказиш ва илтимосларига биноан уларни тугатилган иш материаллари билан таништириш, шунингдек, таништирув жараёнида келиб чиқиши мумкин бўлган бошқа масалаларни ҳал этиш.

Жиноят ишини тугатишга бевосита ишни юритаётган терговчи ваколатлидир. Лекин жиноят ишини тугатиш масаласи ҳамма вақт ҳам фақат уларнинг хоҳиши ёки розилиги билан ҳал қилинмайди. Амалдаги жиноят-процессуал нормаларга мувофиқ, жиноят ишини тугатишнинг айрим асослари юзасидан бошқа шахслар (гумон қилинувчи, айбланувчи, жабрланувчи)нинг розиликлари ёки қарши эмасликлари, баъзи ҳолатларда эса хоҳишлиари (ташаббуслари) ҳам талаб этилади. Жумладан, Жиноят-процессуал кодекси 84-моддасининг биринчи қисми 1–3-бандларида жиноят ишини тугатиш учун айбланувчи ёки улар вафот этган бўлса, уларнинг яқин қариндошлари ишни давом эттиришни талаб қилмаган бўлиши кўрсатилган. Ушбу норманинг тўртинчи қисмига мувофиқ, томонларнинг ярашганлиги муносабати билан жиноят ишини тугатиш учун жабрланувчи Жиноят кодексининг 66<sup>1</sup>-моддасида кўрсатилганидек, гумон қилинувчи (айбланувчи) билан ярашиш истагини билдириши керак.

Жиноят ишини тугатиш асослари моҳияти ва мазмуни жиҳатидан бир-биридан фарқ қилгани туфайли, улар юзасидан аниқланиши ва исботланиши лозим бўлган ҳолатлар ҳам турли кўринишларга эга бўлади [6]. Масалан, ЖПК 84-моддасининг бешинчи қисмида келтирилган «ижтимоий хавфи катта бўлмаган ёки унча оғир бўлмаган жиноятни биринчи марта содир этган шахс айбини бўйнига олиш тўғрисида арз қилган, чин кўнгилдан пушаймон бўлган, жиноятнинг очилишига фаол ёрдам берган ва келтирилган заарни бартараф қилган бўлса» асоси билан жиноят ишини тугатиш учун жиноятнинг биринчи марта содир этилганлиги, етказилган заарнинг бартараф қилинганлиги, шахснинг ўз қилмишидан чин кўнгилдан пушаймонлиги ва жиноятнинг фош этилишига фаол қўмаклашгани ҳамда бошқа шу каби ҳолатлар аниқланиши шарт. Жиноят ишини тугатиш институти шахсларнинг хукуқларини тиклаш ёки жиноят йўлига адашиб кириб қолган кишиларга ўзларининг ғайриқонуний хатти-харакатларидан пушаймон бўлиб, тегишли жазодан озод бўлиш имконини бериши билан бирга, жамиятда келгусида жиноятчиликнинг олдини олишда ижтимоий-сиёсий, процессуал-хукуқий, жиноят-хукуқий ва тарбиявий жиҳатдан муҳим аҳамият касб этади.

### **Жиноят ишини тугатишнинг ижтимоий-сиёсий аҳамияти қўйидагиларда намоён бўлади:**

- жиноят ишини тугатиш тўғрисидаги қарор (ажрим) давлат томонидан олиб борилаётган ислоҳотнинг инсонпарварлиги, демократик принципларга мослиги, шунингдек, суд ва тергов органларининг жиноятчиликка қарши кураш борасида олиб бораётган фаолиятини ўзида мужассам этади;
- жиноят ишини тугатиш тўғрисидаги қарор ёки ажримни фақат маҳсус ваколатга эга мансабдор шахс (терговчи) чиқаради.

**Жиноят ишини тугатишнинг процессуал-хуқуқий аҳамияти қуйидагилардан иборат:**

- айби бўлмаган шахсни ноқонуний равища жиной жавобгарликка тортиш ҳолларининг олди олиниши ва ҳақиқий айбдорларнинг фош этилиши;
- иш бўйича тўпланган барча далиллар таҳлил қилиниб, уларга якуний баҳо берилиши ва ана шу баҳо асосида тегишли хулоса чиқарилиши;
- гумон қилинувчи (айбланувчи)нинг ҳимояланишдек конституциявий хуқуки амалга оширилиши, шунингдек, жиноят процессининг бошқа иштирокчилари (жабрланувчи, фуқаровий даъвогар, фуқаровий жавобгар) нинг ҳуқуқлари ва қонуний манфаатлари таъминланиши;
- ишнинг якунидан манфаатдор бўлган процесс иштирокчилари (гумон қилинувчи, айбланувчи, жабрланувчи ва бошқалар) га қонунда белгиланган муддат давомида терговчининг жиноят ишини тугатиш тўғрисида чиқарган қарори устидан прокурорга шикоят қилиш хуқуқини юзага келтирилиши;
- фуқаролар қонунга зид равища жиной жавобгарлик ва жазога тортилмасликлари учун процессуал кафолатлар яратилиши;
- тергов органлари ва прокурорнинг дастлабки терговнинг ҳар томонлама тўлиқ ва холисона олиб борилишини процессуал ва ташкилий назорат қилишнинг бир шакли хисобланиши.

Жиноят ишини тугатишнинг жиноий-хуқуқий аҳамияти шахснинг содир этган жиноятини квалификация қилиш ва уни жиной жавобгарликдан озод қилиш каби масалаларни ҳал этишда мансабдор шахснинг жиноий-хуқуқий нормадан келиб чиқиши билан боғлиқ.

**Жиноят ишини тугатишнинг тарбиявий аҳамияти қуйидагиларда ўз аксини топади:**

- гумон қилинувчи (айбланувчи) терговчининг жиноят ишини тугатиш ҳақидаги қарорига асос бўлган материаллар билан танишиб, тўпланган далиллар асосида хулосанинг тўғрилигига ишонч ҳосил қилиши;
- ЖПКнинг 83-моддасида кўрсатилган асослар билан жиноятишини тугатишда айбиз деб топилган шахсга нисбатан қўлланиладиган реабилитация чоралари нафақат гумон қилинувчи (айбланувчи)га ва унинг оила аъзоларига, балки ишнинг якунидан манфаатдор, шунингдек, ушбу хабардан воқиф бўлган ҳар бир фуқарога ижобий таъсир кўрсатиши ва ҳоказо.

Жиноят-процессуал хуқуқ назарияси жиноят ишини тугатиш “асослари” билан бир қаторда, жиноят ишини тугатиш “шартлари” ни ўрганишни ҳам тақозо этади. Эътиборли жиҳати мазкур тушунчалар ўзининг мазмуни ва аҳамияти жиҳатидан бир-бирига жуда яқин, лекин улар бир хил маънони англашмайди.

Бугунги қунга қадар на қонун нормаларида, на жиноят-процессуал назарияда уларнинг ўзига хос, бир-биридан ажратиб турувчи белгилари бўйича ягона фикр мавжуд.

Назаримизда, амалдаги қонун нормасида тўғридан-тўғри ифодаланган ҳолатлар жиноят ишини тугатиш “асоси” ҳисобланади. Масалан, 84-модданинг биринчи қисми 1-бандида қайд этилган“жавобгарликка тортиш муддати ўтган бўлса” асоси, жиноят ишини тугатиш учун “асос” бўлса, мазкур асосни қўллаш учун аниқланиши лозим бўлган ҳолатлар, жиноят иши бўйича “шартлар” бўлиб хизмат қиласди. Яъни жавобгарликка тортиш муддати давомида бошқа жиноят содир этмаганлиги, содир этган жинояти тинчлик ва хавфсизликка қарши қаратилмаганлиги ва бошқалар.

Шуни алоҳида қайд этиш лозимки, жиноят ишин тугатиш учун “асос” “шартлар” га нисбатан муҳим ёки аксинча, бўлиши мумкин эмас. Ушбу ҳолатда бирламчи, иккиламчи қоидасини қўллаш нотўғри. Зеро, ҳар бир ишни тугатиш асосини қўллаш бўйича ҳам асос, ҳам шартларнинг тўлиқ аниқланмаганлиги бу борада қабул қилинадиган қарорларнинг ноқонуний ва асоссиз бўлишига олиб келади.

Фикримизча, амалдаги жиноят ва жиноят-процессуал қонун нормаларида қонуншунос ҳар бир ишни тугатиш асосини қўллаш асослари ва шартларини тўлиқ белгилashi лозим. Чунки, ЖК ва ЖПКда ишни тугатиш асосларини қўллаш шартларининг белгиланиши уларни қўлловчи органлар учун қатор қулийликлар келтириб чиқаради.

Юқоридаги фикр-мулоҳазалар жиноят ишини тугатиш шартларини қўйидаги мазмунда таърифлаш имконини беради: “Жиноят ишини тугатиш шартлари деганда, жиноят ишини тугатилишини тақозо этадиган, тегишли ишни тугатиш асосини қўллаш учун аниқланиши лозим бўлган ҳолатлар, фактлар ва вазиятларни тушуниш лозим”.

### **Адабиётлар:**

1. Ўзбекистон Республикасининг Жиноят-процессуал кодекси // Ўзбекистон Республикаси қонунчилик маълумотлари миллий базаси – URL: <https://lex.uz/docs/111460> (мурожаат санаси: 07.09.2022)
2. Камалходжаев Д. Конституционные гарантии прекращения уголовных дел // Конституция ва фуқаролик жамиятини шакллантиришнинг долзарб муаммолари: Республика илмий-назарий конференцияси материаллари (2002 йил 14 ноябрь). – Т., 2003
3. Кулаҳметов А. Б. Вояга етмаганлар иши билан шуғулланувчи комиссияга материалларни қўриб чиқиш учун бериб, жиноят ишини тугатиш. –Т., 2002.
4. Уголовный процесс: Общая часть. Учебное пособие в 2-х частях. Часть II / Автор-составитель У. А. Тухташева. – Т., 2007.
5. Уголовный процесс: Учебник для вузов / Под общ. ред. В.И. Радченко. –24-е изд., перераб. и доп. – М., 2006.
6. Ўзбекистон Республикаси Олий судининг ахборотномаси. – 2002. – № 1–2.